

আহলে হাদীস নামধারীদের ভ্রান্ত ধারণার খণ্ডন

মাওলানা মুহাম্মদ আবদুল মান্নান

লা-মাযহাবী আহলে হাদীস: আলবানীর খণ্ডণে

একথা এখন প্রায় সবার নিকট স্পষ্ট যে, নজদী-ওহাবীদের একটা অংশ মাযহাবের অনুসরণের গুরুত্ব (ওয়াজিব হওয়া)কে অস্বীকার করতে গিয়ে নিজেদেরকে ‘আহলে হাদীস’(হাদীসের পরিবার) বলে পরিচয় দিয়ে আসছে, যখন সৌদী-ওহাবীরা তাদেরকে একই উদ্দেশ্যে ‘সালাফী’ বলে পরিচয় দিচ্ছে। তারা হানাফী, শাফে’ঈ, মালেকী ও হাম্বলী মাযহাবের কোনটার অনুসরণ না করে সরাসরি হাদীসের উদ্ধৃতি দিয়ে নামায ও নামায-সংশ্লিষ্ট মাসআলা-মাসাইল আবিষ্কার করে সেগুলোকে বিভিন্নভাবে এদেশে প্রচার করছে। আর এ বলে সরল-প্রাণ মুসলমানদের ধোঁকা দিচ্ছে যে, তাদের আবিষ্কারকৃত পদ্ধতিগুলোই নাকি নামায ইত্যাদির সঠিক পদ্ধতি; আর মাযহাবের বিশ্ব বিশ্ব্যাত ইমামগণের, বিশেষত ইমাম-ই আ’যম আবু হানীফা রাহমাতুল্লাহি তা’আলা আলায়হির প্রদত্ত সমাধান ও পদ্ধতিগুলোকে ভুল বলার মতো জঘন্য ধৃষ্টতা দেখাচ্ছে। অথচ এদেশের প্রায় সব মুসলমান হানাফী মাযহাবের অনুসরণ করে আসছেন, যা তাঁদের সঠিক সিদ্ধান্ত। কারণ তাঁরা ক্বোরআন, সুন্নাহ, ইজমা ও ক্বিয়াস-ই শর’ইর অনুরূপ আমল করে আসছেন।

অতি সম্প্রতি, এক সচেতন শিক্ষিত ব্যক্তিত্ব রাউজান নিবাসী জনাব আবদুস সামাদ আমাকে একটি পুস্তিকা দিলেন, যার শিরোনাম হলো, (তাদের ভাষায়) ‘সহীহ ছালাত’। পুস্তিকাটা লিখেছেন সালাফী-আহলে হাদীসের গুরু মু. নাছির উদ্দীন আলবানী, পরিবেশক আযাদ বুকস, আন্দর কিল্লাহ, চট্টগ্রাম। পুস্তিকাটিতে নামাযের নিয়মাবলী যা লিখা হয়েছে, সেগুলোর অধিকাংশ হানাফী মাযহাবের পরিপন্থী। যেমন তাকবীর-ই তাহরীমার সময় হাত কাঁধ পর্যন্ত তুলে মেয়েদের মতো বুকের উপর বাঁধা, ইমামের পেছনে নিয়ত করে সূরা ফাতিহা পড়া, প্রত্যেক তাকবীর-ই ইস্তিক্বালিয়ার সময় হাত তোলা (রফ’ই ইয়াদাঈন), আ-মী-ন বড় করে বলা ইত্যাদি। পুস্তিকাটিতে তাদের প্রত্যেক দাবীর পেছনে তারা ‘হাদীস’ উল্লেখ করেছেন, যার ফলে কিছু কিছু সরল-প্রাণ মুসলমানের মনে নানা প্রশ্ন ও সংশয় দানা বাঁধছে; অথচ তাদের উপস্থাপিত প্রত্যেকটা প্রমাণের

দাঁতভাঙ্গা জবাব আমাদের হানাফী সুন্নীদের পক্ষ থেকে দেওয়া হয়েছে অনেক দিন আগে। ফলে সারা দুনিয়ার আলিমগণ, এমনকি মাযহাবের অন্যসব ইমামও ইমাম-ই আ’যম ও হানাফী মাযহাবকে শ্রেষ্ঠ ও সঠিক বলেছেন।

সুতরাং বর্তমানে ওই সব মাযহাব-বিরোধী লোকের খণ্ডণ করা ও বাংলাভাষী মুসলমানদেরকে তাদের খপ্পর থেকে রক্ষা করা অপরিহার্য হয়ে পড়েছে। এ নিবন্ধে আলবানীর পুস্তিকাটিতে উদ্ধৃত প্রতিটি বিভ্রান্তির খণ্ডণ করার প্রয়াস পেয়েছি।

॥এক॥

‘তাকবীর তাহরীমা’ করার সময় হাত কান পর্যন্ত উঠাতে হবে

আলবানীর পুস্তিকা ‘সহীহ ছালাত’-এর ৪র্থ মাসআলা হচ্ছে- তাকবীর-ই তাহরীমার সময় হাত কাঁধ কিংবা কান বরাবর উঠিয়ে ‘আল্লাহু আকবার’ বলে বুকের উপর বাম হাতের উপর ডান হাত রাখতে হবে। [পৃষ্ঠা -৪]

অথচ নামাযে তাকবীর-ই তাহরীমার সময় পুরুষদের জন্য কান পর্যন্ত হাত উঠানো সুন্নাহ। কিন্তু ওহাবী গায়র-মুকাহ্বিদগণ মেয়েলোকদের মতো কাঁধ দু’টি থেকে বৃদ্ধাঙ্গুলি ছেড়ে দিয়ে বুকের উপর হাত বাঁধে; অথচ পুরুষের জন্য হাত কান পর্যন্ত তুলে নাভীর নিচে বাঁধাই সুন্নাহ। তাই প্রথমে কান পর্যন্ত হাত উঠানোর মাসআলাটা সপ্রমাণ উল্লেখ করে এর পরে নাভীর নিচে হাত বাঁধার মাসআলাটা ধারাবাহিকভাবে উল্লেখ করার প্রয়াস পাবো- ইনশা-আল্লাহ! দু’টি পরিচ্ছেদে কান পর্যন্ত হাত তোলার বিষয়টি বিস্তারিতভাবে উপস্থাপন করা হবে। প্রথম পরিচ্ছেদে হাদীসে বর্ণিত প্রমাণাদি উল্লেখ করা হবে এবং দ্বিতীয় পরিচ্ছেদে লা-মাযহাবীদের বিভিন্ন আপত্তি ও সেগুলোর খণ্ডণ করা হবে।

প্রথম পরিচ্ছেদ

কান পর্যন্ত হাত উঠানোর পক্ষে অনেক হাদীস শরীফ রয়েছে। তন্মধ্যে কয়েকটা মাত্র নিম্নে পেশ করছি-

হাদীস নম্বর ১-৩

ইমাম বোখারী, মুসলিম ও ত্বাহাভী হযরত মালিক ইবনে হুযায়রিস থেকে বর্ণনা করেছেন-

প্রবন্ধ

كَانَ النَّبِيُّ صَلَّى اللَّهُ عَلَيْهِ وَسَلَّمَ إِذَا كَبَّرَ رَفَعَ يَدَيْهِ حَتَّى يُحَازِيَ أُنْثِيَهُ وَفِي لَفْظٍ حَتَّى يُحَازِيَ بِهَا فُرُوعَ أُنْثِيِهِ-

অর্থ: হযরত-ই আকরাম সাল্লাল্লাহু তা'আলা আলায়হি ওয়াসাল্লাম যখন তাকবীর বলতেন, তখন আপন দু'হাত মুবারক তাঁর উভয় কান পর্যন্ত উঠাতেন। অন্য বচনে এভাবে আছে- উভয় কানের লতি পর্যন্ত উঠাতেন।

হাদীস নম্বর-৪

আবু দাউদ শরীফে হযরত বারা ইবনে আযিব রাদিয়াল্লাহু তা'আলা আনহু থেকে বর্ণিত-

رَأَيْتُ رَسُولَ اللَّهِ صَلَّى اللَّهُ عَلَيْهِ وَسَلَّمَ إِذَا فَتَحَ الصَّلَاةَ رَفَعَ يَدَيْهِ إِلَى قُرَيْبٍ مِّنْ أُنْثِيِهِ ثُمَّ لِيَعُوذَ-

অর্থ: আমি হযরত-ই আনওয়ারকে দেখেছি যে, যখন তিনি নামায আরম্ভ করতেন তখন নিজের হাত মুবারক উভয় কানের নিকট পর্যন্ত উঠাতেন। এর পর আর হাত উঠাতেন না (রফ'ই ইয়াদাঙ্গিন করতেন না)।

হাদীস নম্বর-৫

মুসলিম শরীফে হযরত ওয়া-ইল ইবনে হজর রাদিয়াল্লাহু তা'আলা আনহু থেকে বর্ণনা করেছেন-

أَنَّه رَأَى النَّبِيَّ صَلَّى اللَّهُ عَلَيْهِ وَسَلَّمَ رَفَعَ يَدَيْهِ حِينَ دَخَلَ فِي الصَّلَاةِ كَبَّرَ قَالَ لَحْدُ الرُّوَاةِ جِبَالُ أُنْثِيِهِ ثُمَّ لِيَعُوذَ-

অর্থ: তিনি হযরত-ই আকরাম সাল্লাল্লাহু তা'আলা আলায়হি ওয়াসাল্লামকে দেখেছেন যে, হযরত যখন নামাযে প্রবেশ করেছেন তখন আপন দু'হাত মুবারক উঠিয়েছেন। এক বর্ণনাকারী বলেছেন, আপন দু'কানের বরাবর, তারপর আপন কাপড়ে দু'হাত গোপন করে (ঢেকে) নিয়েছেন।

হাদীস নম্বর ৬-৮

বোখারী আবু দাউদ, নাসাঈ হযরত আবু ক্বালাবাহ রাদিয়াল্লাহু তা'আলা আনহু হতে বর্ণনা করেছেন-

أَنَّ مَالِكَ بْنَ حُوَيْرِثٍ رَأَى النَّبِيَّ صَلَّى اللَّهُ عَلَيْهِ وَسَلَّمَ يَرْفَعُ يَدَيْهِ إِذَا كَبَّرَ وَإِذَا رَفَعَ رَأْسَهُ مِنَ الرُّكُوعِ حَتَّى يَبْلُغَ فُرُوعَ أُنْثِيِهِ-

অর্থ: হযরত মালিক ইবনে হুয়াইরিস নবী করীম সাল্লাল্লাহু তা'আলা আলায়হি ওয়াসাল্লামকে দেখেছেন, তিনি উভয় হাত মুবারক উঠাতেন যখন তাকবীর-ই তাহরীমাহ্ বলতেন আর যখন রুকু' থেকে শির মুবারক উঠাতেন। তখন শেষ পর্যন্ত উভয় হাত মুবারক উভয় কানের লতি মুবারক পর্যন্ত পৌছে যেতো।

হাদীস নম্বর ৯-১২

ইমাম আমদ, ইসহাক ইবনে রাহওয়াইহ্, দারু কুতুনী ও তাহাভী হযরত বারা ইবনে আযিব থেকে বর্ণনা করেছেন-

كَانَ رَسُولُ اللَّهِ صَلَّى اللَّهُ عَلَيْهِ وَسَلَّمَ إِذَا صَلَّى رَفَعَ يَدَيْهِ حَتَّى تُكُونَ إِبْهَامَاهُ حِذَاءَ أُنْثِيِهِ-

অর্থ: যখন নবী করীম সাল্লাল্লাহু তা'আলা আলায়হি ওয়াসাল্লাম নামায পড়তেন, তখন এ পর্যন্ত উভয় হাত মুবারক উঠাতেন যে, তাঁর বৃদ্ধাঙ্গুলী যুগল উভয় কান মুবারকের বরাবর হয়ে যেতো।

হাদীস নম্বর ১৩-১৫

ইমাম হাকিম মুস্তাদ্রাকে, দারু কুতুনী এবং বায়হাকী অত্যন্ত বিশ্বস্ত সনদে, যা ইমাম বোখারী ও বোখারী শরীফের শর্তাবলীর অনুরূপ, হযরত আনাস রাদিয়াল্লাহু তা'আলা আনহু থেকে বর্ণনা করেছেন-

رَأَيْتُ رَسُولَ اللَّهِ صَلَّى اللَّهُ عَلَيْهِ وَسَلَّمَ كَبَّرَ فَحَازَى بِإِبْهَامَيْهِ أُنْثِيَهُ-

অর্থ: আমি রসুলুল্লাহ সাল্লাল্লাহু তা'আলা আলায়হি ওয়াসাল্লামকে দেখেছি যে, তিনি তাকবীর বললেন আর আপন উভয় বৃদ্ধাঙ্গুলী শরীফ আপন উভয় কান মুবারকের বরাবর করে নিয়েছেন।

হাদীস নম্বর ১৬-১৭

ইমাম আবদুর রাযযাক ও ইমাম তাহাভী হযরত বারা ইবনে আযিব রাদিয়াল্লাহু তা'আলা আনহু থেকে বর্ণনা করেছেন-

كَانَ النَّبِيُّ صَلَّى اللَّهُ عَلَيْهِ وَسَلَّمَ إِذَا كَبَّرَ لِفَتْحِ الصَّلَاةِ رَفَعَ يَدَيْهِ حَتَّى يُكُونَ إِبْهَامَاهُ قَرِيبًا مِنْ شَحْمَةِ أُنْثِيِهِ-

অর্থ: যখন নবী করীম সাল্লাল্লাহু তা'আলা আলায়হি ওয়াসাল্লাম নামায আরম্ভ করার জন্য তাকবীর বলতেন, তখন এ পর্যন্ত হাত শরীফ উঠাতেন যে, তাঁর উভয় বৃদ্ধাঙ্গুলী শরীফ উভয় কান মুবারকের লতির বরাবর হয়ে যেতো।

হাদীস নম্বর-১৮

ইমাম আবু দাউদ হযরত ওয়াইল ইবনে হজর রাদিয়াল্লাহু তা'আলা আনহু থেকে বর্ণনা করেন-

أَنَّ النَّبِيَّ صَلَّى اللَّهُ عَلَيْهِ وَسَلَّمَ رَفَعَ يَدَيْهِ حَتَّى كَانَ بِجِبَالِ مَنْكَبَيْهِ وَحَازَى بِإِبْهَامَيْهِ أُنْثِيَهُ-

অর্থ: হযরত-ই আকরাম সাল্লাল্লাহু তা'আলা আলায়হি ওয়াসাল্লাম উভয় হাত মুবারক উঠালেন এ পর্যন্ত যে, উভয় হাত শরীফ তো উভয় স্কন্ধের এবং উভয় বৃদ্ধাঙ্গুলী শরীফ উভয় কান মুবারকের বরাবর হয়েছিলো।

হাদীস নম্বর-১৯

দারু কুতুনী হযরত বারা ইবনে আযিব রাদিয়াল্লাহু তা'আলা আনহু থেকে বর্ণনা করেন-

প্রবন্ধ

أَنَّهُ رَأَى النَّبِيَّ صَلَّى اللَّهُ عَلَيْهِ وَسَلَّمَ حِينَ افْتَتَحَ رَفَعَ حَتَّى حَازَى بِهِمَا أُذُنَيْهِ ثُمَّ لَمْ يَعُدْ إِلَى شَيْءٍ مِنْ ذَلِكَ حَتَّى فَرَعَ مِنْ صَلَوَتِهِ-

অর্থ: তিনি হুযূর-ই আকরামকে দেখলেন যখন তিনি নামায আরম্ভ করেছেন, তখন আপন হাত মুবারক উঠালেন এ পর্যন্ত যে, ওই দু’টিকে উভয় কান মুবারকের বরাবর করে নিয়েছেন। তারপর নামায সমাপ্ত করা পর্যন্ত আর হাত উঠাননি।

হাদীস নম্বর-২০

তাহাভী শরীফে হযরত হুমায়দ সা’ইদী থেকে বর্ণনা করা হয়েছে-

أَنَّهُ كَانَ يَقُولُ لِإِصْحَابِ رَسُولِ اللَّهِ صَلَّى اللَّهُ عَلَيْهِ وَسَلَّمَ أَنَا أَعْلَمُكُمْ بِصَلَاةِ رَسُولِ اللَّهِ صَلَّى اللَّهُ عَلَيْهِ وَسَلَّمَ كَانَ قَامَ إِلَى الصَّلَاةِ كَثِيرَ وَرَفَعَ يَدَيْهِ حَذَاءَ وَجْهِهِ-

অর্থ: তিনি হুযূর-ই আকরামের সাহাবীদেরকে বলতেন, তোমাদের সবার চেয়ে আমি হুযূর-ই আকরামের নামায সম্পর্কে বেশী জানি। তিনি যখন নামাযে দণ্ডায়মান হতেন, তখন তাকবীর বলতেন আর আপন হাত মুবারক চেহারা শরীফের বরাবর পর্যন্ত উঠাতেন।

কান পর্যন্ত হাত উঠানোর পক্ষে আরো বহু হাদীস শরীফ পেশ করা যেতে পারে। এখানে মাত্র বিশটি হাদীস শরীফ উল্লেখ করলাম। যদি আরো বেশী চান তাহলে হাদীস শরীফের কিতাবাদি, বিশেষ করে ‘সহীহুল বিহারী শরীফ’ পর্যালোচনা করুন। সেটার মতো কিতাব হানাফী মাযহাবের সমর্থনে ‘হাদীসের জামি’ (হাদীস সম্ভার) আজ পর্যন্ত দেখা যায়নি।

যুক্তিগত দলীলাদি

যুক্তি (আকূল)ও চাচ্ছে যে, নামায আরম্ভ করার সময় উভয় কান পর্যন্ত উভয় হাত উঠানো হোক। কেননা, মুসল্লি নামায আরম্ভ করার সময় ইবাদতে মশগুল হয় এবং দুনিয়াবী ঝগড়া-বিবাদ থেকে পৃথক ও সম্পর্কহীন হয়ে যায়। পানাহার, কথাবার্তা, এদিক-ওদিক দেখা, সব কিছু নিজের উপর হারাম করে নেয়। সে যেনো দুনিয়া থেকে বের হয়ে উর্ধ্ব জগতে ভ্রমণ করে। ওরফে, যখন কোন জিনিষ থেকে তাওবা কিংবা পৃথক করানো হয় তখন কানগুলোতে হাত রাখানো হয়, কাঁধ ধরানো হয় না। নামাযীও যেন মুখে (তাকবীর বলে) নামায শুরু করে, আর কাজে কানগুলোতে হাত রেখে দুনিয়া থেকে পৃথক হয়ে থাকে। এমন সময় কাঁধ ধরা একেবারেই গ্রহণযোগ্য নয়। যেমন সাজদায় মুসলমান মুখেতো মহান রবের মহত্ব ও

বড়ত্বের কথা স্বীকার করে, আর ভূপৃষ্ঠের উপর মাথা রেখে নিজের অক্ষমতা ও বিনয়ের কথা এমনভাবে প্রকাশ করে। অনুরূপ, নামায শুরু করার সময় একাংশের স্বীকার মুখে করা হয়; অপর অংশের প্রকাশ আমল (কর্ম) দ্বারা করা হয়।

দ্বিতীয় পরিচ্ছেদ

এ মাসআলার বিপক্ষে আপত্তি ও খণ্ডন

এ মাসআলায় গায়রমুকাব্বিদ (মাযহাব অমান্যকারী)দের দু’টি আপত্তি রয়েছে, যে দু’টি আপত্তি তারা সর্বত্র পেশ করে থাকে-

এক. ইমাম বোখারী ও ইমাম মুসলিম হযরত আবু হুমায়দ সা-ইদী রাহিয়াল্লাহু তা’আলা আনহু থেকে এক দীর্ঘ হাদীস বর্ণনা করেছেন, যাতে একটা বচন এমন আছে যে-
إِذَا كَبَّرَ جَعَلَ يَدَيْهِ حَذَاءَ مَنْكِبَيْهِ-
যখন তাকবীর বলতেন তখন আপন হাত শরীফ স্কন্ধযুগলের বরাবর করে নিতেন। এ হাদীস শরীফ অনেক সনদ দ্বারা বর্ণিত। বুঝা গেলো যে, স্কন্ধযুগল পর্যন্ত হাত উঠানো সুন্নাত। কানগুলো পর্যন্ত উঠানো সুন্নাতের পরিপন্থী।

খণ্ডন

এ হাদীসগুলো হানাফী মাযহাবের একেবারে বিরোধী নয়। কেননা, কানের সাথে বৃদ্ধাঙ্গুলী লাগাতে গেলে হাত দু’টি কাঁধের সমান (বরবার)ই হয়ে যাবে এবং উভয় হাদীসের উপর আমল হয়ে যাবে। কিন্তু কাঁধ পর্যন্ত হাত উঠিয়ে কাঁধকে স্পর্শ করার মধ্যে ওই সব হাদীসের উপর আমলই করা হয় না, যেগুলোতে কান পর্যন্ত হাত উঠাতেন মর্মে উল্লেখ করা হয়েছে। হানাফী মাযহাবের অনুসারীরা উভয় প্রকারের হাদীসের উপর আমল করে থাকে। আর ওহাবী-মাযহাবীরা এক প্রকারের হাদীসকে ছেড়ে দেয়। সুতরাং হানাফী মাযহাব ব্যাপকতর; বরং হাদীস নম্বর ১৮তে এর স্পষ্ট বর্ণনা দেওয়া হয়েছে। তা হচ্ছে হুযূর-ই আনওয়ার সাল্লাল্লাহু তা’আলা আলায়হি ওয়াসাল্লাম হাত শরীফ এভাবে উঠাতেন যে, হাত শরীফ স্কন্ধযুগল পর্যন্ত থাকতো, বৃদ্ধাঙ্গুলী দু’টি থাকতো কান পর্যন্ত। সুতরাং না হাদীস শরীফগুলো পরস্পর বিরোধী, না ওই দু’ধরনের হাদীসের মধ্যে সামঞ্জস্য বিধান করা অসম্ভব। শুধু তোমাদের বুঝা ও অনুধাবনের মধ্যে হেরফের হয়েছে।

সমস্ত গায়র মুকাব্বিদ (লা-মাযহাবী, আহলে হাদীস ও সালাফী)র প্রতি সাধারণ ঘোষণা রইলো- এমন কোন

প্রবন্ধ

মারফু' (সরাসরি হুযূর-ই আকরামের সূত্রে বর্ণিত হাদীস শরীফ দেখান যা'তে একথা রয়েছে যে, হুযূর-ই আকরাম আপন বৃদ্ধাঙ্গুলী শরীফ দু'টি কাঁধ পর্যন্ত উঠাতেন। যেখানেই কাঁধগুলোর কথা আছে, ওখানে তো হাত শরীফ এরশাদ হয়েছে, আর যেখানে কানের কথা উল্লেখ করা হয়েছে, সেখানে বৃদ্ধাঙ্গুলী শরীফ বলা হয়েছে। এ থেকে বুঝা যায় যে, উভয় কাঁধ পর্যন্ত হাত এভাবে উঠাতেন যে, বৃদ্ধাঙ্গুলী শরীফ কান শরীফ পর্যন্ত পৌঁছে যেতো।

দ্বিতীয় আপত্তি

তারা বলেন, কান পর্যন্ত হাত শরীফ উঠাতেন মর্মে যেসব হাদীস শরীফ আপনারা (সুন্নী হানাফী মুসলমানগণ) পেশ করেছেন, সবকটি 'য'ঈফ' (দুর্বল)। সুতরাং সেগুলো আমল যোগ্য নয়।

খণ্ডন

এ আপত্তির কয়েকটা জবাব দেওয়া যেতে পারে-

এক. ওহাবী গায়র মুকাদ্দিসগণ তাদের অভ্যাসের গোলাম। তাদের অভ্যাস হচ্ছে তাদের বিপক্ষে যে সব হাদীস আছে সবকটিকে তারা বিনা কারণে 'য'ঈফ' (দুর্বল) বলে বসে। (এ ক্ষেত্রেও তাই ঘটেছে।)

দুই. আমরা এ পরম্পরায় বোখারী ও মুসলিমের হাদীসও উল্লেখ করেছি। ওইগুলোর উপর তো তোমাদের পাকাপোক্ত ঈমান থাকার কথা। (সুতরাং ওইগুলো মেনে নাও।)

তিন. 'য'ঈফ' হাদীসও যখন কয়েকটা সূত্রে (সনদ) বর্ণিত হয়, তখন তা শক্তিশালী ও 'হাসান' পর্যায়ে হাদীস হয়ে যায়। দুর্বল খড়কুটাগুলোও পরস্পর মিলে মজবুত রশি হয়ে যায়। সুতরাং একাধিক দুর্বল সনদ ও হাদীসের মতন (বচন)কে কেন মজবুত করবে না? 'জা-আল হক' ২য় খণ্ডের ভূমিকাটা পাঠ-পর্যালোচনা করলে এ সম্পর্কে ভুল অবশ্যই ভাঙ্গবে।

চার. আমাদের উপস্থাপিত এ হাদীসগুলো অনুসারে মুসলিম উম্মাহর বিজ্ঞ আলিম, ওলী ও নেককার ব্যক্তিবর্গ আমল করেছেন। উম্মাহর আমলের কারণেও হাদীস শরীফ শক্তিশালী হয়ে যায়।

পাঁচ. যদি এ হাদীসগুলো (তোমাদের কথা মতো) দুর্বল হয়, তবুও ইমাম-ই আ'যম আবু হানীফা রাহিয়াল্লাহু তা'আলা আনহুর মতো ইমাম সেগুলো গ্রহণ করেছেন। এটাও তো ওইগুলোকে শক্তিশালী ও গ্রহণযোগ্য করে দেয়। কেননা, নেককার যোগ্য আলিম গ্রহণ করলেও দুর্বল হাদীস শক্তিশালী হয়ে যায়।

ছয়. নির্বিচারে ওইসব হাদীসকে 'দুর্বল' বলে ফেলাকে 'জরহে মজহুল' (অজ্ঞাত কারণে সমালোচিত) বলা হয়, যা কোন মতেই গ্রহণযোগ্য নয়। কারণ, তাতে দুর্বল হবার কোন কারণ বলা হয়নি। বলা হয়নি সেগুলো কি কারণে দুর্বল?

সাত. যদি মুহাদ্দিসগণ উক্ত হাদীস শরীফগুলো দুর্বল হিসেবে পান, তবে তা ইমাম-ই আ'যম আবু হানীফা রাহিয়াল্লাহু তা'আলা আনহুর উপর কোন প্রভাব ফেলতে পারবে না। কারণ, তাঁর সমসাময়িক যুগে কোন দুর্বল বর্ণনাকারী হাদীসের সনদগুলোতে অন্তর্ভুক্ত হয়নি। পরবর্তী যুগের দুর্বলতা পূর্ববর্তীদের জন্য ক্ষতিকারক নয়। সুতরাং সালাফী-ওহাবী প্রমুখেরও আশাপ্রদ আপত্তিটাও টুকরো টুকরো হয়ে উড়ে গেলো। আল্ হামদু লিল্লাহি রাব্বিল আলামীন।

অতএব, হানাফী মাযহাবই বিস্তুক ও শ্রেষ্ঠ হলো। তাই গোমরাহী ও ধোঁকাবাজির পথ ছেড়ে এটাকেই গ্রহণ করে নেওয়ার প্রতি উদাত্ত আহ্বান জানাচ্ছি।

[সূত্র: জা'আল হক, ২য় খণ্ড ইত্যাদি।]

(চলবে)